

# El respublikismo ĝis Esperanto, tra framasonismo

7/2010

Oni apenaŭ povas paroli nuntempe pri Framasonaro en Hispanio, ĝia ekzisto estas anekdota, kiam ne karikatura. Sed temis iam pri movado influa, en tia grado ke ĝi fariĝis unu el la du plej malamataj tendencoj de la venkinta flanko de civila milito, tiel ke la unuaj tribunaloj starigitaj por entrepreni la subpremado de la malvenkintoj nomiĝis

“Speciala Tribunalo por subpremo de Framasonaro kaj Komunismo”. Kiel tio povis okazi? Pro tio ke Framasonismo fariĝis preskaŭ sinonima kun respublikismo kaj kontraŭklerikismo.



## La unuaj paŝoj

La Framasonaro venis al Hispanio en la komenco de la 18-a jarcento, el norda Eŭropo. La unuajn loĝiojn establis britiaj vizitantoj, kiuj enportis siajn ritojn kaj filozofion. Jam en 1727 ekzistis loĝioj en Andaluzio, kaj la sekvan jaron angla lordo fondis alian en Madrido. Sed la ĉefa tendenco de la hispania framasonaro spegulis la francian tradicion, pli politikan, kaj la framasonoj baldaŭ fariĝis reprezentantoj de la laikismaj kaj kontraŭklerikalaj tendencoj. Jam antaŭ tio, inter 1740 kaj 1750 ni trovas la unuajn subpremadojn, sekve al papa buleo. Bona grupo trafis en la prizonojn de la Inkvizicio, kiu ne perdis okazon kondamni iliajn kutimojn kaj mondpercepton.

La reformoj entreprenitaj en la lando meze de la 18-a jarcento koincidis kun la baza filozofio de la Framasonaro, kaj kelkaj el la ĉefaj reprezentantoj de la Klerismo kaj la intelekta kaj politika elito fariĝis framasonoj. En 1780 formiĝis la Granda Oriento, apartigita de la regula britia tendenco. Komence de la 19-a jarcento tiu progresema sektoro dividiĝis en du sektorojn: tiuj kiuj apogis la kampanjojn

de Bonaparte, kiuj ricevis la nomon de francigitaj, kaj tiuj kiuj integriĝis en la rezistaj fortoj. En la ĉefa politika ilo de tiu ĉi tendenco, la Korteso de Kadizo, t.e. la parlamento kunigita en la ne konkerita urbo tiunoma, kiu establis la unuan konstitucion de la lando, granda parto de la reprezentantoj estis framasonoj, inklude de kelkaj pastroj. Sed post la reveno de la burbona monarĥio, kaj de la absolutismo, en 1814 la Framasonaro estis strikte malpermesita, kaj ĝiaj membroj persekutitaj kaj torturitaj de la denove funkcia Inkvizicio.

Dum la 19-a jarcento, la framasonaro konservis sian influon inter la progresema tendencoj. La leĝa situacio estis nestabila: persekutita dum la periodoj kiam la Eklezio plej influis, akceptita kaj eĉ influa dum la regado de la liberaluloj. En diversaj okazoj la povo favoris la loĝiojn regulajn (proksimajn al la anglosaksa normo), kaj fermis tiujn orientitajn al socia agado. Dum la Unua Respubliko, establita en 1873, tri aŭ, laŭ aliaj fontoj, eĉ ĉiuj kvar el la sinsekvaj prezidentoj estis framasonoj. La reveno al la monarĥio ne kaŭzis problemojn al la organizaĵo dekomence, sed fine de la 19-a jarcento renoviĝis malpermesoj, post forta kontraŭstaro de la papoj kaj la loka katolika Eklezio, kaj post la akuzo al la framasonoj ke ili favoris la sendependecon de la malnovaj kolonioj en Kubo, Portoriko kaj Filipinoj.

La komenco de la 20-a jarcento vidis intensigon de la agado de la Framasonaro. Ĝi reprezentis la pinton de la politika agado de la progresema burĝaro kaj etburĝaro, kaj dominis la radikalajn movadojn favoritajn de tiu ĉi. Ĝi havis malmultan influon en la laborista movado, interalie pro sia oficiala doktrino de interpaciĝo kaj socia harmonio, sed ankaŭ ne mankis la laboristaj gvidantoj, kiuj proksimiĝis aŭ anis en la organizaĵo.

## La intermilita periodo

En 1917 okazis forta krizo en la hispania socio, kun kontestaj movadoj, strikoj kaj posta subpremo. La framasonaro estis

akuzita instigi revolucion, eĉ se vere, kiel dirite, ĝia influo en laboristaj movadoj estis malgranda. Tom simile estis jam okazinta en 1909, dum la Tragika Semajno de Barcelono, en kiu oni legis similajn kulpigojn, pro la framasona aneco de Francisco Ferrer Guardia, kiun oni akuzis je instigo de la revoluciaj agadoj kaj mortpafis. Post la Unua Mondmilito, la framasonoj fariĝis la ĉefa movado favoranta la respublikemajn tendencojn, kio kondukis al diversaj persekutoj, ĉefe dum la diktaturo de la generalo Primo de Rivera dum la jardeko de 1920.

La Dua Respubliko, proklamita en 1931, estis la Ora Epoko de la Framasonaro en Hispanio. Pli ol 150 deputitoj estis framasonoj, granda parto de la ministroj aŭ altaj funkciuloj estis samtempe ĉefgvidantoj de la Granda Oriento aŭ la Granda Nacia Loĝio. La Framasonaro batalis favore al la laikeco de la ŝtato, la ampleksigo de la ĝenerala edukado kaj la libereco de opinioj kaj esprimado. Samtempe, tiu influo kauzis fortan politikigon, kiu nur kreskigis la malamon de la reakciaj fortoj kontraŭ ĝi. Post la venko de la Popola Fronto en februaro 1936, diversaj propagandistoj de la ekstrema dekstro parolis pri kunfluo de framasonoj, judoj kaj komunistoj, por detrui la nacion. Tio estas des pli absurda ke en Hispanio tiutempe apenaŭ ekzistis judoj, elpelitaj antaŭ pli ol kvar jarcentoj, kaj ke la komunistaj partioj estis treege malforta ĝis tiu momento.

### Milito kaj subpremo

Kiam en julio 1936 leviĝis parto de la armeo kaj de la civila loĝantaro kontraŭ la legitima registaro, la framasonoj fariĝis unu el la unuaj celoj de la

subpremo de la reakcio. Tio eksplikiĝas per tiu ĝenerala percepto jam komentita, sed ankaŭ pro la persona malŝato de la homo kiu baldaŭ fariĝis la ĉefkomandanto de la faŝista armeo, la generalo Franco (Franko). Oni konsideru ke la framasonaro havis multe da membroj inter la militistoj, kaj ĝi estis fariĝinta dum la antaŭaj jardekoj unu el la sidejoj de la sociigo de tiaj profesiuloj. Framasonoj estis pluraj generaloj, inter kiuj, paradokse, la unua prezidanto de la rebela Junto, kaj elstara framasono estis la frato de Franco, Ramón, tre konata aviadisto kaj radikalulo. Sed Francisco Franco, kiu, laŭ diversaj atestoj, mem estis klopodinta aniĝi en antaŭa periodo, sed estis rifuzita, disvolvis personan malamon, akuzante la Framasonaron pri la malunuiĝo de la armeo kaj pri la lukto kontraŭ la tradicia Hispanio.

Post la sistema persekuto de la framasonoj dum la milito, oni starigis tuj post ĝia fino, en 1940, Specialan Tribunalon por la subpremo de Framasonismo kaj Komunismo (la alia obseda kontraŭanto de la reakciularo), kiu komencis senlaca persekuton kontraŭ anoj de ambaŭ tendencoj. Oni starigis en Salamanko (Salamanca) specialan arĥivon por kolekti la dokumentojn de tiu lukto (ankoraŭ ekzistantan, kvankam kun ŝanĝitaj celoj), kaj en ĝi oni reprezentis specimenon de framasona loĝio, kun propagandaj celoj. Tiu propagando estis kondukita de Franco mem, kiu persone kaj pseŭdonime verkis plurajn tiutemajn artikolojn kaj eĉ tutan libron pri la temo.

La aparteno al framasonaro estis pligraviga cirkonstanco ĉe juĝaj kondamnoj, kaj miloj da framasonoj estis punitaj ĝis morto

nur pro tio. La Framasonaro ĝisradike malaperis el la hispania teritorio.

Nur en la jardeko de 1970 eblis rekomenci framasonan agadon, komence pere de revenintaj ekzilitoj aŭ elmigrintoj, aŭ de eksterlandaj civitanoj loĝantaj en Hispanio. Post la morto de la diktatoro estis leĝigitaj pluraj loĝioj. Nuntempe ekzistas renoviĝinta movado, dividita inter la regula framasonaro, malmulte politika kaj proksima al la anglosaksa tradicio, kaj la sekvantoj de la Granda Oriento. Sed ambaŭ estas tre malfortaj, kaj apenaŭ influaj. Kio plu restas influa estas, paradokse, la kontraŭframasona propagando, reprezentata de diversaj reakciaj verkistoj, kiuj plu kulpigas ĝin



pri granda parto de la problemoj de la lando, kaj kiuj ne hezitas eĉ akuzi la nunan prezidenton Zapatero pri aniĝo en la sekto. Sed la vera influo havas neniun rilaton kun tiu atingita dum la 1930-aj jaroj, kiel povas konstati ĉiu ajn objektiva kaj ne konspirema observanto.

## Framasonaro kaj Esperanto

Kiam oni studas la historion de framasonaro en Hispanio dum la unuaj jardekoj de la jarcento, oni povas rimarki surprize multajn paralelaĵojn kun la Esperantismo, ne nur pro simileco en la socia fono de ambaŭ movadoj kaj ties anoj, sed ankaŭ ĉar pluraj el la okazintaĵoj estis tre paralelaj: la cikloj de kresko kaj krizo, de persekutoj kaj favoroj, de internaj disiĝoj kaj kvereloj tre similas. Kompreneble ekzistis ankaŭ diferencoj: la esperanta movado estis multe pli malforta kaj malpli influa, kaj aliflanke ŝajnas al mi ke



Julio Mangada, dekstre, kun siaj amikoj Emilio González Linera kaj Fernando Redondo.

ĝi enhavis pli altan pluralecon. Aliflanke, pluraj el la plej konataj gvidantoj de la ĝenerala esperantista movado estis framasonoj. Ne estas do mirinde ke por multaj hispanianoj, Esperanto estas

konsiderata, eĉ nun, kiel lingvo de framasonoj kaj anarĥiistoj. Tio estas evidente malprava konkludo, sed oni ne povas kulpigi tiujn kiuj tiel pensas, ĉar pluraj trajtoj de ambaŭ movadoj povas konduki al tiu konfuzo.

Ni scias ke la Esperantismo alvenis al Hispanio, kiel al aliaj landoj de Eŭropo, tra rondoj de la ilustrita etburĝaro, kie ankaŭ framasonoj havis sian bazon, kaj kelkaj el la unuaj pioniroj estis mem framasonoj.

La plej konata inter la framasonaj esperantistoj estis la militisto Julio Mangada Rösenorn, kiu dum multaj jaroj estis la plej fama esperantisto de la lando, kaj ĉefa gvidanto de la neŭtralaj asocioj. Jam

komence de la jardeko de 1910, li fondis rondon, kun alia militisto, Fernando Redondo, kaj presisto Emilio González Linera, kaj publikigis artikolojn en framasona gazeto dulingva "Luz Española/Hispana Lumo". Ili eĉ redaktis framasonan revuon en Esperanto "Homaro". Mangada kaj iliaj amikoj vidis grandajn similecojn inter la idealoj de Zamenhof kaj framasonismo, kaj estis ili kiuj publikigis la "Deklaracion pri homaranismo" de Zamenhof kiam tiu ĉi spertis malfacilojn tion fari en aliaj rondoj kiuj ne bone akceptis la zamenhofan ideologiemon koncerne la lingvon. La grupo de Mangada fondis landan asocion en Hispanio dum la Unua Mondmilito, post kiam la antaŭa devis malfondiĝi, kaj nomis ĝin ĝuste "Zamenhofa Federacio".

Mangada estis tre fama en la politika aktivado dum la intermilita periodo. Oni bone konis liajn radikalajn idealojn, lian aktivadon favore al la respubliko, kaj lia framasona aneco. Ĝenerale, post tiu unua iniciato de "Homaro", oni evitis la malferman kunigon de ambaŭ aspektoj. Sed la apudesto de la vortoj "framasono" kaj "esperantisto" en la prikruboj pri Mangada estas oftaj en la tiutempaj kaj en la prihistoriaj verkoj.

González Linera estis dum multaj jaroj la ĉefa presisto de verkoj en Esperanto en Hispanio. Li mem ne estis flua parolanto de la lingvo, sed precipe favoris la idealon malantaŭ ĝi. Pri lia graveco, ni aldonu ke ĉirkaŭ la mezo de la 1920-aj jaroj, kiam la Granda Oriento Hispana devis malfondiĝi, kaj la situacio de la framasonismo estis sufiĉe konfuzita, pro internaj krizoj kaj eksteraj subpremoj, li estis la ĉefa gvidanto de federacio de loĝioj,

kiu tamen ne daŭris multe.


Fernando Redondo, kies graveco en la esperantista movado estis pli granda, kaj kiu mem verkis en la lingvo, estis ankaŭ tre aktiva framasono. Ni povas rakonti, anekdote, ke li estis "kulpulo" pri incidento en la esperantista grupo de Majorko, kiam li subskribis mesaĝon en la honora libro de la klubo, kaŭze de sia reveno al Madrido, per framasona simbolo. Sekve de tio, la klubo preferis kaŝi la libron, por eviti problemojn kun la aŭtoritatoj.

Tiun anekdoton rakontas la historiisto Xavier Margais, en sia impona verko pri la esperantista movado en Majorko, kie li ankaŭ informas ke almenaŭ du el la plej fruaj membroj de SAT en la Balearaj Insuloj, Joan Matas kaj Antoni Coll, apartenis al la framasonaro, la unua kun la simbola nomo "Zamenhof". Ambaŭ estis mortpafitaj de la faŝistoj tuj post la triumfo de la ribelo en la insulo.

Multaj aliaj esperantistoj estis framasonoj. Kvankam en tiu sekreta, aŭ pli bone dirite, diskreta, asocio oni neniam povas esti certa pri aniĝoj, ni scias ke framasono estis la ĉefa aktivulo de la socialista esperantistaro, kaj aktiva SAT-ano, la arĥitekto Francisco Azorín Izquierdo. Ankaŭ Guillermo Bosch (Vilhelmo Bosk), kiu estis unu el la redaktoroj de la revuo "Popola Fronto" kaj estas konata en SAT-rondoj pro sia polemiko kun Lanti pri sennaciismo, estis framasono. Ambaŭ sukcesis ekziliĝi kaj tiel savis sian vivon.

Pli malbonŝancis Sidonio Pintado, kiu tuj antaŭ la milito estis prezidinta la Hispanan Esperanto-Asocion, kaj kiu estis pafmortigita tuj post la militfino. Tiu estas certe ekzemplo de unu el tiuj kazoj, kiujn ni antaŭe

7/2010



menciis, en kiu esti framasono estis pligraviga cirkonstanco por la Tribunalo.

Antaŭ kelkaj monatoj mi trovis interesan enketon en la persona protokolo de alia militisto, Antonio Jiménez

oni suspektis ĉu li estis vere lojala al la ribelo, aŭ temis nur pri geografia cirkonstanco. Por tio, oni enketis pri lia ebla aparteno al framasonaro, kaj en tiu esploro oni lin demandis

Mora. Li estis esperantisto, kaj iam organizis hispanian kongreson en sia urbo Oviedo. Kiam la milito komenciĝis li troviĝis en la teritorio kie la puĉo triumfis, kaj do partoprenis en la militaj agadoj en la faŝista flanko. Sed ŝajne

pri liaj esperantistaj agadoj. Finfine, li spertis nenium gravan ĉagrenon, sed estas evidente en la dokumentaro ke iamaniere en la kapo de la juĝistoj troviĝas ia nekonscia ligo inter ambaŭ aferoj.

Tiu ligo komplete perdiĝis post la fino de la milito. La esperantismo ne tiom suferis kiom la framasonismo, sed ankaŭ ne mankis ĝenadoj. Sed se ĝi supervivis, tio necesigis la pardonon de ĉia socia engaĝiteco. Nur la fino de la diktaturo permesis revigligon de socia esperantismo, kaj ankaŭ de framasonismo. Sed nun ambaŭ movadoj sekvas tute malsamajn vojojn. Aŭ eble ne.

Toño del Barrio



## Framasonismo en Japanio

Laŭinterrete, en 1957 en Japanio estis pli ol 2500 framasonoj; en 1972 kreskis ĝis 5000; poste malkreskis; en 2007 ekzistis 20-25 loĝioj, devenaj el Britio (1), Skotio (2), Filipinoj (2), Usono (kelkaj) kaj aliaj, kun 2300 membroj sub "Japana Granda Loĝio", kiu amike rilatas kun pli ol 150 Grandaj Loĝioj en la tuta mondo.

Iuj loĝioj havas regulan kunsidon ĉiusemajne, la aliaj ne publikigas informojn en interreto. La aliĝkotizo al loĝio estas inter 50000-80000 enoj (ĉ. 450-720 eŭroj) kaj la jara membrokotizo estas inter 5000-8000 enoj (ĉ. 45-72 eŭroj).

Laŭ iu ĵurnalo nun enlande troviĝas ĉirkaŭ 2000 framasonoj, el kiuj 300 estas japanoj kaj la aliaj estas koncernatoj pri usona armeo rezidanta kelkloke en Japanio.

Japana framasonismo ekhistoriis en la fino de Edo-epoko (1603-1868) dum la japana registaro fermis la pardonon kontraŭ aliaj landoj escepte de Nederlando, el kiu venis medicinistoj kaj komercistoj.

Inter 1779-1784 trifoje nederlanda framasono Issac Titsingh venis al Nagasako, kie la registaro permesis internacian

komercon. Li estis estro de Nederlanda Komerca Domo en Nagasako. Verŝajne li estis la unua framasono vizitinta Japanion.

En la fino de Edo-epoko la registaro malfermis la pardonon. Tiam inflacio malfaciligis la vivon de japanoj, el kiuj iuj atakis alilandanojn pro ŝovinismo. Post la protesto de aliaj landoj rezidis en Jokohamo brita kaj franca armeoj.

En 1864 venis al Jokohamo brita roto, kies parto konsistis el "Sfinksa Loĝio, n-ro 263" sub "Irlanda Granda Loĝio". En 1865 la loĝio organizis la unuan kunvenon de framasonismo en Jokohamo. Fondiĝis "Jokohama Loĝio, n-ro 1092", la unua loĝio en Japanio. Poste naskiĝis 5 britaj loĝioj kaj 3 skotaj loĝioj. Ĉiuj framasonoj estis alilandanoj.

Eksterlande ekde 1864 kelkaj japanaj sciencistoj, diplomato kaj aliaj framasoniĝis en Nederlando, Britio, Usono, Filipinoj.

Enlande la militisma kaj naciisma registaro malpermesis al japanoj liberecon fondi asocion kaj kunveni, dum alilandanoj apenaŭ havis liberecon.

Multaj framasonoj kontribuis al la

7/2010

modernigo de Japanio: germana komercisto, brita diplomato/literaturisto, brita ĉefo de Oosaka Monfarejo, brita ĵurnalistoj, brita komunikaĵingenerio, franca arkitekto, brita ŝipkonstruĝingenerio, itala fotisto, usona kuracisto kaj aliaj.

En 1887 nova leĝo en la nomo de socia sekuro ekfunkciis por sufoki demokratiigan/homrajtigan movadon. Framasonismo celis demokratismom, tial ĝi estis subpremata en la reĝimoj de faŝismo, totalismo, socialismo, komunismo, naziismo tra la mondo.

Ekde 1937 Japanio militis kontraŭ Ĉinio. La kontraŭframasonisma potenco regis Japanion influite de naziismo, kiu mem subpremis framasonojn kaj judojn. Ĉiuj loĝioj devis esti fermitaj de la polico.

Post la dua mondmilito la framasonisma movado reviviĝis kun la fondo de 16 loĝioj inter 1947-1956. En 1950 unuafoje membriĝis 7 japanoj inkluzive de 5 parlamentanoj. Hatojama Iĉiroo, tiama ĉefministro, la avo de la ĵus demisiinta ĉefministro

Hatojama Jukio, estis la unua Granda Mastro de framasonismo en Japanio. Usona framasono, Douglas MacArthur (Supera Komandanto de la Aliancaj Armeoj) intencis framasonigi Akihito, Ŝoŭa-Imperiestron, sed vane.

En Japanio stranga onidiro ankoraŭ kuras: framasonoj agas laŭ la ordono de judoj. Tio malveras. La naziisman propagandon utiligis la japanaj militistoj, kaj oni stultas kredi.

Se mi komparas framasonismon kun Esperanto, mi neniel povas akcepti framasonismon. [framasonismo/framasonoj] [Esperanto/esperantistoj] fermata asocio malfermata asocio kun hierarkio sen hierarkio nur viroj viroj, virinoj, infanoj kun rekomendo de framasonoj sen rekomendo de esperantistoj komunistoj ne komunistoj jes ateistoj ne ateistoj jes handikapitoj ne handikapitoj jes moralistoj jes malmoralistoj jes riĉuloj jes malriĉuloj jes kun religia kredo sen aŭ kun jes.

Masakato



## Framasonismo tra kvar jarcentoj

Framasonismo fariĝis kvazaŭ universala en la okcidenta mondo. Asocioj diskretaj, foje sekretaj, la framasonaj "oboj" estas samtempe unuecaj kaj malsimilaj.

Malsimileco estas evidenta inter la britaj

funkciadon:

- Oftaj kunvenoj de bazaj unuoj, la loĝioj (ĝis 60 masonoj) kie la anoj praktikas sian masonismon. Kvankam ligitaj al siaj oboj, la loĝioj estas suverene decidpovaj.

- Varbado per kooptado.


- Unuseksecio (krom kelkaj maloftaj esceptoj) framasonismo estas ĉefe vira afero, sed nun floriĝas virinaj oboj.

- Iom-post-ioma inicado por alireblo al gradoj pli kaj pli proksimaj al la lumo, al la kono.

- Uzo de esoteraj ritoj celante al disiĝo inter ekstera mondo, tiu de la profanuloj, kaj la interna mondo, la templo.

Sed el kie venas tiuj organizoj? Kia estis ilia historia evoluo? Regas iom da mistero.

Legendo diras, ke la framasonaj loĝioj rekte devenas de iom-post-ioma transformiĝo de praaĵ laboristaj asocioj, aparte de la konstruantoj de la katedraloj dum mezepoko. Tia legendo ne verŝajnas des pli ke de ĝia konata komenco aliĝis, estis iniciatitaj .. gravuloj. Strategie, kio permesis la supervivon de loĝioj en mondo



/ usonaj organizoj, kies membroj devas fidi je Dio, kaj la "Granda Oriento de Francio" kaj aliaj oboj kiuj forlasis la referencon al la "granda arkitekto" kaj fariĝis laikaj.

Similecoj evidentiĝas rilate la internan

7/2010

grandskale surmetita al cenzuro. La estroj konas la sekreton do protektas la movadon !

Evidentas tamen, la ligo inter framasonismo kaj laboristaj organizoj. Ĝi rezultas el imitado.

Alia karakterizo de la masona movado estas akcepto de plej diversaj homoj, diversaj medioj kaj planoj, diversaj religioj. Tiu socia miksiĝo iom post iom enkondukis novajn ideojn, progresisman etoson provokante malkontenton ĉe la eklezioj, aparte la katolika.

La agado de la loĝioj estas duobla:

- Ĉe iliaj membroj, al kutimiĝo al libera penso, nova koncepto pri spiritualeco ne ligita al la dogmemo kiu rezultas el la devena medio.

- Ekstere, iom-post-ioma evoluo de la tuta socio ĝis pli demokratia, laŭ jura funkciado. Se la framasonismo ne kreis nian modernan mondon, ĝi evidente helpis, favorigante ĉiuspecajn interŝanĝojn.

Venas la riproĉo: per sia enkonduko en la rondojn de la povo kaj la frata helpo de siaj membroj, ĉu la masonismo ne konstruis novan formon de povo, plie kaŝita, sekreta povo? Jen akuzo kiu ĉefe venas el la malamiko de la masonismo, de tiuj kiuj antaŭe posedis la povon kaj ne hezitis cenzuri, eĉ kondamni por gardi siajn privilegiojn ?

Gerardo Lieblang



## Framasonismo laŭ Vikipedio

Framasonismo estas tutmonda organizo kiu klopodas plibonigi la mondon per tolero. Ĝi estas malnova organizo, kiu uzas sekretajn ritojn de la mezepoka masonista gildo (la franca etimo francmaçon signifas "libera masonisto". Framasonoj kunvenas ĉe framasona loĝio, celanta la kunhelpon inter siaj membroj kaj ĝenerale la plibonigon de la moraleco, frateco kaj justeco en la socio. Ĉiuj Framasonoj asertas ekzistadon de unusola dio, kreinto de la mondo, tamen la framasonaj loĝioj ne apogas specifajn religiojn.

Plejparte framasonoj estas nur viroj, kaj ĝenerale virinoj ne estas permesitaj aliĝi. En multaj landoj framasonaj reguloj

malpermesas framasoniĝon de virinoj, kvankam en kelkaj landoj ĉi-tiu regulo estas malpli severa, permesanta ilian aliĝon. Tamen, estas flankogrupoj kiuj bonvenas virinojn. En Francio estas ankaŭ framasona organizo nur por virinoj.



Multokaze dum historio framasonoj kondamniĝis. Framasonoj estas ofte riĉaj kaj influaj. Ilia toleremo kaj interhelpo igis ilin konvenaj por burĝaj liberaluloj batalantaj aristokrataron kaj oficialan religion. Pro malhelaj antaŭjuĝoj kaj politikaj kontraŭemoj, en Francio de la jaroj 1930-aj, la faŝismemaj dekstruloj multe parolis pri "la juda-framasona komploto". Kelkaj diras, ke framasonismo

estas religio. Plue, aliaj kondamnas framasonojn pro permeso de multaj religiaj vidpunktoj, kaj pensas, ke framasonoj minacas ilian religion. Kelkaj masonaj tendencoj estas diismaj, aliaj, ĉefe en Francio estas ateaj kaj kontraŭpastrecaj. Tial la katolika Eklezio ekskomunikis ilin.

Tamen, framasonismo nek estas religio, nek instruas pri religio rekte. Tradiciaj framasonistoj ne permesas ateistojn aliĝi, sed honoras nenium specifan dion. La ritoj estas sekretaj, sed estas uzitaj por alegorio, salutado, identigado de aliaj framasonoj, kaj tiel plu.

### Kontraŭuloj de framasonismo

Kiel malnova kaj kaŝema organizo, framasonismo havas multajn malŝatantojn. Kelkaj malŝatas framasonismon ĉar framasonoj uzas sekretajn ritojn.

Fonto Vikipedio :

<http://eo.wikipedia.org/wiki/Framasonismo>

22-06-2010



# Ĉu SAT estas framasona asocio ?

7/2010

Unua vide, ŝajnas ke tia demando sonas iom strange. Kio komuna inter laborista esperanta asocio kaj la framasonismo ?

Tro ofte, framasonoj estas rigardataj kiel stranguloj kiuj praktikas el ekstere ne kompreneblajn "folklorajn" ritojn.

La plej granda parto el la tutmonda framasonaro estas ligita al la anglo parolanta mondo kaj referencas al Dio (la Granda Arkitekto, kiu ne estas la Dio de tiu aŭ alia eklezio sed komuna figuro).

Escepto estas la framasonaro en Francio kaj aliaj latinaj landoj, kie ekzistas obooj kie la referenco al la Granda Arkitekto malaperis.

La framasonaj loĝioj kaj obooj estas plej ofte unuseksaj (la plimulto akceptas virojn, kelkaj obooj estas virinaj, ambaŭ seksaj obooj estas esceptaj).

La eniro en masonajn loĝiojn okazas per kooptado kaj inicia ceremonio

Se evidente profesiaj masonistoj povas esti framasonistoj, tio estas tre escepta. La plej granda parto el la framasonoj estas nur filozofaj .

Jen karakterizoj tre malproksimaj de tiuj de SAT..

Ĉu do mi metis la titolan demandon pro simpla provoko? Evidente ne, ĉar sub la tre videblaj diferencoj sin kaŝas simileco..

Simileco laŭ la celoj spite al gravaj diferencoj laŭ la metodoj kaj ĉirkaŭaĵoj .

Kiacele la framasonismo? Eduka kaj kleriga sistemo ĝi estas.. Kelkaj framasonoj eĉ komparis siajn loĝiojn al universitato por plenkreskuloj por la tuta vivo.

Per kia metodo? Trastudo kaj interpretado de simboloj, taskoj prezentitaj antaŭ la fratoj de la loĝio.. entute konstanta trejnado al verkado kaj publika parolado.

Jen venas aspekto kiu foje malkvietigas: la sekreto.. Sekreto unue tre necesa pro la persekutado kiun suferis tiaj grupigoj ekster margene de la socio sub la influo de la eklezioj, gvidataj de maltoleremaj registaroj. Restas, en pli toleremaj landoj, la ideo de la disciplino de la sekreto kiu protektas la liberan esprimon de diversaj vidpunktoj.

Mi devas bedaŭrinde agnoski ke diversaj grupoj politikaj aŭ krude aferismaj sin maskas sub framasona aspekto, tiel konfuzigante la eksteran bildon de la framasona movado.. Tiuj fiuloj ne speguligas la veran framasonismon.

## Ni nun vizitu la SAT statuton :

*SAT, ne estante partipolitiĉa, sed nur kleriga, eduka kultura organizo, celas ke ĝiaj membroj estu komprenemaj kaj toleremaj al la politikaj kaj filozofaj skoloj aŭ sistemoj sur kiuj sin apogas la diversaj klasbatalaj laboristaj partioj kaj sindikatmovadoj; per komparo de faktoj kaj ideoj, per libera diskutado, ĝi celas malebligi ĉe membroj la dogmiĝon de la instruoj, kiujn ili ricevas en siaj apartaj medioj.*

*Unuvorte, SAT celas per konstanta uzado de racie elpensita lingvo kaj ĝia mondskala aplikado, helpadi al la kreado de racie pensantaj spiritoj, kapablaj bone kompari, ĝuste kompreni kaj prijuĝi ideojn, tezojn, tendencojn, kaj sekve kapablaj elekti memstare la vojon, kiun ili opinias plej rekta, aŭ plej irebla por la liberigo de sia klaso kaj forkonduko de la homaro al kiel eble plej alta ŝtupo de civilizo kaj kulturo*



La komparo inter la celaro montras altan similecon, des pli ke, historie, oni ŝuldas al la framasonismo ion progreseman : la konstruon de laŭ leĝa ŝtato, eble ne perfekta sed sen dube ŝtupo al pli alta nivelo de civilizo kaj kulturo.

Tiu pozitiva komparo klariĝas se oni atentigas la vivon kaj evoluon de la malnovaj laboristaj organizoj, la kompanaroj kies etoso inspiris la

kreantoj de ambaŭ movadoj. SAT certe rekte fondita de laboristoj, la masonismo inspirita de ties funkciado kaj etoso.

Do ĉu SAT ne estas adaptita formo de framasonismo [fralaborismo], frata asocio de la esperanto movado, sed diferenca de tiu movado ĉar ĝia celo ne estas nur la ekfloriĝo de lingvo sed la klerigado, kulturigo de siaj membroj, uzante tiun mirindan rimedon kiu estas lingvo uzebla de ĉiuj homoj..

Evidente, SAT restu malfermita asocio, alirebla al ĉiu homo kondiĉe ke li aŭ ŝi sentu sin solidara de la laboristoj kaj scipovu esperanton..

Ni simple estu pli konscia pri niaj celoj kaj funkciado, ni estu pretaj doni pli kaj pli da efikeco al niaj labormetodoj en plena respekto de niaj tradicioj..

**Ni fosu nian sulkon!!**

Gerardo Lieblang